

von Wulf Wager

## Aufg'räumt wird!



Kennat Sie des? Em Frühjahr drängt's ons Schwoba emmer drzua, alles sauber aufzomräuma, was sich ibr da Wendr so an Mischtena en Haus ond Garda a'gsammelt hot.

Bei meiner Nochbere – Sia wisat jo, des propere 150-Kilo-Prachtsweib – hot des neulich seltsame Blüta trieba. Ihr Jonger, a 15-jähriger Kerle em beschta Flegelalter, hot partu sei Zemmer net aufräuma wella. Wo er no letscht Wochaende bei ma Fußballturnier war, hot mei

Nochbere ond ihr Ma sei Zemmer ausg'mischtet. Em Januar hot se ihrem Bua scho mit de Worte: "Rumpelkammera werdat bei ons net g'hoizt!" da Thermostat von dr Heizong wegschraubt, dia Rabamuadr. Jedafalls hend se bei dera Aufräumaktion sieba Gelbe Säck, drei 130-Liter Müllsäck nausgschmissa ond 8 Maschina dreggate Wäsch'gwäscha. Auf dem Teppichboda en des Zemmr war bloß no a schmale Spur, die zom Bett g'führt hot. Do hot mei Nochbere em Läbe net durchpasst, deshalb hot se des Aufräuma praktischerweis au lieber ihrem Ma überlassa ond isch im Türrahma hocka bliebe ond hot A'weisonga ertoilt. No hot'r scho net flüchta kenna.

Drnoch hot se ihren plogta Ma no en da Keller gschickt, zom dort au no aufräuma. Aber noch femf Minuta isch'r wieder komma. No hot se'n gfrogt, was los sei? Dodruf er: "I han da Korkazieher vrgessa".

Wo er femf Stond später wieder aus em Keller komma isch, hot sei Frau ganz erschöpft ausgseha: "Was isch'n mit Dir los?"

"I ben ganz he. I han da ganze Mittag mei Handtasch aufg'räumt...."

Bis näggschd Woch'

Ihr